

UPU TOMUA

So'o se faiva lava e si'i a e tapua'ia, e mautinoa lava e osaosa i gutu o liu o va'a le mau ma le manuia o lana fa'atautaiga.

E fa'apena se lagona o lenei Komiti, i le paia o le Ekalesia Aoa, i lau tatalo ma lau tapuaiga ua malolosi ai lenei Komiti i ona faiva. E fa'afoi ai le vi'iga i le Atua, ona o lona mana ua mafai ai e lenei Komiti fa'atauva'a ona saunia ta'iala fa'aleagaga mo ona sauniga o lenei tausaga.

O la tatou Tusi Failotu lea mo lenei Tausaga 2023 ua maea ona tapenaina. O le Vaega muamua Ianuari ia Iuni sa saunia lea e le Susuga i le Faafeagaiga ia Mose Galuvao FS, o le Ekalesia i Vailuutai & Faleatiu, o le sui o le Matagaluega a Aana. O le Vaega fa'ai'u Iulai ia Tesema, sa saunia lea e le Susuga i le Faafeagaiga ia Lafolafo Amituanai FS, o le Ekalesia i Sasa'ai, o le sui o le Matagaluega a Fa'asaleleaga.

E momoli atu ai le fa'afetai i le tamaoiga fa'a-le-agaga sasa'a mai, lea ua tino mai ai lenei galuega tele. E momoli atu fo'i le fa'afetai i le agaga o le galulue fa'atasi o le Komiti, sa silasila ai i itu uma o le galuega auā le manuia o ta'iala mo Sauniga o lenei Tausaga.

E avea fo'i lenei avanoa e momoli atu ai le fa'amalo i ā outou Susuga i Toeaina, o fa'a-Feagaiga ma A'oa'o mo le fa'aauauina o Sauniga fa'a-le-'Au-Taumafai. E lē itiiti fo'i le agaga fa'afetai ma le fa'amālō, i le agaga fai Taulaga ma lou ma'au o lo'o mafai ona fa'ataunu'u ai e lenei Komiti ona tiute ma ana fe'au. Ia fa'amanuia le Atua i lou a'ao foa'i. Fa'afetai fai Taulaga.

Talofa e, sa momoe ma manū e lē fati a e sau mala e atia'e, ua lagona le leo, ma o'o mai tala fa'anoanoa, ua fa'amuta e le Atua galuega a lana auauna, le Susuga i le Faifeau Toeaina ia Taeipo Malifa. O ia fo'i o le Peresetene o lenei Komiti. Ia alofa le Atua ma saga fa'amafanafanaina pea le faletua ia Sitaua ma le nofoāalo, ma aiga, ma le Ekalesia sa punonou ma ofo atu ai lo la soifua galulue mo le Atua. Le paia i le Pulega, ma le Matagaluega a Niusaelese.

Ia faamafanafanaina foi le Komiti ona o le motusia fa'afuasei o la matou mafutaga ma lē sa fai ma sili'aga o lenei Komiti.

Le paia e o le Ekalesia, sagai ane 'ai o le tai i ou faiva i lenei tausaga. Ia lala'oa liu o lou va'a i taumafa fa'a-le-agaga. ma fa'aaogaina pea lo tatou fa'atauva'a e le Atua, e mau ai pea le upega mo lona malo.

Alofa'aga ma Fa'amanuia.

Rev. Elder Siolo Saufatu Tauati FT

FAILAUTUSI KOMITI AU TAUMAFAI

ASO SA. 01 IANUARI 2023. (FA'AFUINA)

MANATU AUTŪ: “MALAGA MA KERISO.”
(*Journey with Christ*)

TUSI FAITAU: Mataio 28: 16 – 20.

MATUA: Mataio 28: 20.

“..ia outou a’oa’o atu ia te i latou ia tausī i mea uma ua ou fai atu ai ia te outou; faauta foi, ou te ia te outou i aso uma lava, e oo lava i le gataaga o le lalolagi.”

Vaega:

1. Tausisi i le ta’iala e manuia ai le malaga.
2. A’oa’o atu le soifua o Keriso.
3. E feagai ma fitā a o Iesu lava e to’amalie ai.
4. E leai se mea e faigata i le Ali’i.

ASO SA. 08 IANUARI 2023.

MANATU AUTŪ: “TULAFONO AURO O LE MALAGA.”
(*The Golden Rule of the Journey*)

TUSI FAITAU: Ioane 13: 31 – 38.

MATUA: Ioane 13: 34.

“O le poloaiga fou ou te tuu atu ai ia te outou, ia outou fealofani faapei ona ou alofa atu ia te outou.”

Vaega:

1. Ia alofa atu fa’apei ona alofa mai o Iesu.
2. E lē atoa ma lē moni le galuega pe a aunoa ma le alofa.
3. Ia manatua Iesu i ou ala uma.
4. Ia fa’asili le alofa i a Iesu, ona faigofie lea ona alofa atu.

ASO SA. 15 IANUARI 2023.

MANATU AUTŪ: “AGA’I I LUMA MA LE FA’ATUATUA.”
(*Go forth with faith*)

TUSI FAITAU: Iosua 3: 9 – 17.

MATUA: Iosua 3: 13.

“A tutū i le vai o Ioritana o alofivae o faitaulaga o e ave le atolaau a le ALII, le Alii o le lalolagi uma, ona vavaeina ai lea o le vai o Ioritana, o le vai e tafe ifo mai luga; e tu foi le vai e pei o se mea maupuepue.”

Vaega:

1. E matala mea uma i ē fa’atuatua i le Ali’i.
2. O le Atua lava e to’atasi le puna o manuia uma.
3. Ia manino le fa’alogo ma usita’ia Afioga a le Atua.
4. Ia maua’ā le fa’atuatua, e faia e le Atua vavega i lona alofa.

ASO SA. 22 IANUARI 2023.

MANATU AUTŪ: “FA’AGALO LEAGA O LE TUANA’I.”
(*Forget our shortfalls of the past*)

TUSI FAITAU: Isaia 43: 14 – 21.

MATUA: Isaia 43: 18.

“Aua tou te manatua mea na muamua, aua fo’i le mafaufau i mea anamua.”

Vaega:

1. Fa’agalo leaga o le tuana’i, tamo’e punoua’i mo le lumana’i.
2. Fa’agalo leaga o le tuana’i, e fa’afou e le Atua le lumana’i.
3. Tuana’i ā o le tuana’i, finau mo se ‘ai i le lumana’i.
4. A moni ona salamō i luma o le Atua, e lē fesiligia le lumana’i.

ASO SA. 29 IANUARI 2023. (ASO SA O TUPULAGA)

MANATU AUTŪ: “IA MANATUA LE TAPUAIGA A MATUA.”
(Remember the prayers of our Parents.)

TUSI FAITAU: 1 Samuelu 17: 16 – 19; 48 – 58.

MATUA: 1 Samuelu 17: 18.

“Ave foi nei tufaaga a suāsusu maaa e sefulu i le alii o lo latou toa afe, ma ia e asiāsi i ou uso po ua manuia, ma ia au mai so latou faamaoni.”

Vaega:

1. A ‘au i tatou ma le Atua, o ai sē fa’asagatau mai?
2. E lē o le poto, e lē o le malosi po o le fitafita, a o le suafa o le Atua.
3. E manumalo pe ā finau ma fa’amoemoe i le Ali’i.
4. O le mamana o le tatalo a matua, e a’e manuia ai faiva.

ASO SA. 05 FEPUARI 2023. (FA’AFOUINA)

MANATU AUTŪ: “TAUSINIŌ MO MEA SILISILI.”
(Strive for the very best.)

TUSI FAITAU: Filipi 3: 12 – 16.

MATUA: Filipi 3: 14.

“..ou te tausisi atu i le faailoga, ia maua ai le tau i na valaauina ai a’u mai luga e le Atua ia Keriso Iesu.”

Vaega:

1. Taula’i le va’ai ma le taumafai ia Keriso.
2. Ia filigā ma fa’amaoni i le Ali’i ina ia maua le tau i lelei.
3. O vala’auina uma e mai ia Keriso. Ia tau le fa’amoemoe o le Ali’i.
4. O Keriso lava le tau i silisili.

ASO SA. 12 FEPUARI 2023.

MANATU AUTŪ: “E UMI LE ALA A O LE ATUA E TA’IALA.”
(It’s a long road, but God is leading the way.)

TUSI FAITAU: Roma 15: 7 – 13.

MATUA: Roma 15: 13.

“O le Atua foi e tupu mai ai le faamoemoe, ia faatutumuina outou e ia i le olioli uma atoa ma le filemu, ina ua faatuatua; ina ia tele lava lo outou faamoemoe ona o le mana o le Agaga Paia”

Vaega:

1. O le Atua lava le tautai poto o le malaga.
2. E mafaia mea uma i le fa’atasi mai o le Agaga Paia.
3. O le fa’atuatua ma fa’amoemoe i le Atua, e galulue fiafia ai.
4. Ia fa’alagolago mea uma i le Atua ma lana ta’ita’iga.

ASO SA. 19 FEPUARI 2023.

MANATU AUTŪ: “E FIAFIA LE ATUA I ALA MAMA.”
(God delights in righteous paths.)

TUSI FAITAU: Salamo 119; 9 – 16.

MATUA: Salamo 119: 10 & 11.

“Ua ou saili ia te oe ma lo’u loto atoa; aua ne’i ou sese i au poloaiga. Ua ou teu i lo’u loto au afioga, ina ne’i ou agasala ia te oe.”

Vaega:

1. Teu i le loto ana Afioga uma, ma ‘aua lava ne’i galo.
2. Sa’ili le Atua ma le loto atoa.
3. Tausisi i ala o le Atua.
4. Ia fiafia i le Tusi Paia ma tatalo e lē aunoa.

ASO SA. 26 FEPUARI 2023.

MANATU AUTŪ: “E SILISILI ESE LAVA IESU I MEA UMA.”
(*Jesus is far greater*)

TUSI FAITAU: Ioane 16: 25 - 33.

MATUA: Ioane 16: 33.

“Ua ou fai atu nei mea ia te outou, ina ia outou maua le manuia ia te au. E maua outou e le puapuaga i le lalolagi, a ia outou loto tetele, ua ou manumalo i le lalolagi.”

Vaega:

1. Ua na o Iesu e manuia ai le taumafai.
2. E tele lu’i ma fa’afitauli, a o Iesu lava le tali.
3. Loto tetele, ua manumalo a’ia’i le Ali’i.
4. E silisili ‘ese lava le Keriso manumalo nai o tatou fa’afitauli uma.

ASO SA. 05 MATI 2023.

(*FA’AFUINA*)

MANATU AUTŪ: “E SILAFIA E LE ATUA LOU TAUTIGĀ.”
(*God knows all our struggles.*)

TUSI FAITAU: Iosua 1: 1 - 9.

MATUA: Iosua 1: 9.

“Ou te lei fai atu ea ia te oe? Ia e faamalosi, ma loto tele; aua e te fefe, aua e te mata’u; auā o le Alii lou Atua o loo ia te oe i mea uma e te alu i ai”.

Vaega:

1. Ia fa’amalolosi mo lo tatou Ali’i.
2. Tatou te mafaia mea uma i le fa’atasi mai o lo tatou Ali’i.
3. E lē popole vale le tagata fa’atuatua.
4. Galue ma le fiafia, ua Ia silafia lou tautigā i le galuega.

ASO SA. 12 MATI 2023.

MANATU AUTŪ: “E TAUIA E LE ATUA Ê ALOLOFA IA TE IA.”
(*God rewards those who love Him.*)

TUSI FAITAU: Roma 8: 18 – 30.

MATUA: Roma 8:28.

“Ua tatou iloa foi e galue le Atua i mea uma lava mo le lelei fatasi ma i latou o e ua alolofa atu ia te ia, o e ua valaauina i lona finagalo.”

Vaega:

1. O galuega alofa i le Atua, e i ai fa’atasi lava ma Ia.
2. Ua ta’oto le tau i lou tautigā i ona manuia atali.
3. O galuega lelei uma; ona o le fa’amoemoe e lē va’aia.
4. O manuia ua pale ai e na mua i malae, o fa’atali mai fo’i mo i tatou.

ASO SA. 19 MATI 2023.

MANATU AUTŪ: “O GALUEGA LELEI UMA E MO LE ALII.”
(*All that we do, is for the Lord.*)

TUSI FAITAU: Kolose 3: 18 – 25.

MATUA: Kolose 3: 23.

“O mea uma lava tou te faia, ia faia ma le loto, peiseai ua faia i le Alii, a e le o tagata”

Vaega:

1. Ia faia galuega uma ma le loto atoatoa i ai.
2. O le atiina’eina o le Ekalesia; o taulaga lava ia mo le Ali’i.
3. O tatou o auauna a Keriso e atia’e lana galuega.
4. Ia atagia le alofa o Iesu i so’o se tafa o lo tatou ola.

ASO SA. 26 MATI 2023.

MANATU AUTŪ: “IA FAI MA MALAMALAMA O KERISO.”
(*Be Chirst’s Light.*)

TUSI FAITAU: Mataio 5: 14-21.

MATUA: Mataio 6: 16.

“Ia faapea ona pupula atu lo outou malamalama i luma o tagata ina ia latou iloa la outou amio lelei, latou te vivii atu ai i lo outou Tama o i le lagi.”

Vaega:

1. Avea au galuega e fai ma malamalama o le Atua.
2. E ta’uleleia ia Keriso le amio lelei e fa’aalia i galuega.
3. E vi’ia le Atua i galuega lelei ua faia.
4. Taleni, poto ma le malosi, o malamalama ia o Keriso.

ASO SA. 02 APERILA 2023. ASO SA LAUPAMA (FAAFOUINA)

MANATU AUTŪ: “O IESU O LE MESIA PUAPUAGATIA.”
(*Jesus is truly the suffering Messiah.*)

TUSI FAITAU: Mareko 15: 33 – 41.

MATUA: Mareko 15: 39.

“O le ta’ita’i o le toaselau, o le na tu atu i ona luma, ua iloa e ia ua faapea ona to o lana mānava, ona faapea atu ai lea o ia. “E moni, o se alo o le Atua lenei tagata.”

Vaega:

1. Ua talitonu ma ta’utino i ai tagata o nu’u ese’
2. Amata i le alaga; osana! A e fa’ai’u fa’asatauro. Aisea?
3. A o i tatou, ua o tatou talitonu ‘ea?
4. Ia manatua o Ia i lenei vaiaso ma ona tigā ona o i tatou.

ASO SA. 09 APERILA 2023.

(ASO SA TOETŪ)

MANATU AUTŪ: “E MALOSI LAVA LE MEA MONI.”
(*Truth always wins.*)

TUSI FAITAU: Mataio 27: 62 – 28: 8.

MATUA: Mataio 28: 5.

“Ona fai atu ai lea o le agelu i fafine, ua faapea atu, “Aua lua te matatau; auā ua ou iloa ua oulua sailia mai Iesu na faasatauroina.”

Vaega:

1. E malosi le mea moni, a e le moni se mea malosi.
2. O Afioga uma a le Ali’i, e tumau le moni ma le fa’amaoni.
3. Ua na o le Atua le malosi moni.
4. O le soifua manumalo o Keriso, o lo tatou malosi e gata ai malosi.

ASO SA. 16 APERILA 2023.

MANATU AUTŪ: “Ō MA LE FIAFIA, TALA’I ATU LE MESIA.”
(*Go with joy, proclaim the Messiah.*)

TUSI FAITAU: Mareko 16: 14 – 20.

MATUA: Mareko 16: 20.

“Ona latou o atu lea, ma tala’i atu i mea uma; ua galue faatasi le Alii ma i latou, ma ua faamaonia le upu i faailoga ua mulimuli ane ai.”

Vaega:

1. Tula’i ia ma ō e tala’i atu le Keriso manumālō.
2. ‘Aua le masalosalo, a ia toa le loto e tala’i atu le Ali’i toetū.
3. Tala’i le alofa o le Atua na ala mai ia Keriso.
4. Ō ma le mautinoa, e i ai fa’atasi lava o Ia ma lana ‘au-tala’i.

ASO SA. 23 APERILA 2023.

MANATU AUTŪ: “LOTO TELE E TALA’I LE MĀLŌ O LE ATUA.”
(*Take courage, declare the Kingdom of God.*)

TUSI FAITAU: Isaia 8: 9 – 18.

MATUA: Isaia 8: 16.

“Fusifusi ia le mau, faamaufailoga ia le tulafono mā o’u soo.”

Vaega:

1. E lepetia e le Atua fuafuaga lē tatau a le lalolagi uma.
2. ‘Aua le fefe i le lalolagi, a ia fefe ma mata’u i le Atua.
3. Ia mataāla ma fa’atuatua i le Atua, e lē moe le fili.
4. Ia galulue fa’atasi ma le ‘au-fa’atuatua, tala’i le mālō o le Atua.

ASO SA. 30 APERILA 2023.

MANATU AUTŪ: “UA NĀ O IESU E SA’OLOTO AI I TATOU.”
(*Only Jesus can set us free.*)

TUSI FAITAU: Ioane 8: 31 – 43.

MATUA: Ioane 8: 36.

“O lenei, pe a tuu sa’oloto outou e le Atalii, ona sa’oloto faamaoni ai lea o outou.”

Vaega:

1. O le mataupu a Iesu, o le mataupu mo le sa’olotoga.
2. Iloa ma ola i le upu moni, ona sa’oloto lea.
3. Tasi le Tamā, ia o tatou fai e pei ona finagalo mai.
4. Auē! Ta fia sa’oloto lava Iesu.

ASO SA. 07 ME 2023.

(FA’AFOUINA)

MANATU AUTŪ: “UA OLA I TATOU ONA O KERISO IESU.”
(*We live because of Christ Jesus.*)

TUSI FAITAU: Efeso 2: 1 – 10.

MATUA: Efeso 2: 8.

“Auā o le alofa tunoa ua faaolaina ai outou i le faatuatua; e le mai ia te outou foi lea, a o le mea ua foaiina mai e le Atua.”

Vaega:

1. Tasi a le afuaga o lo tatou fa’aolaina; alofa tunoa o le Atua.
2. E lē taugofie lo tatou fa’aolataga.
3. Salamō ia ma talia o Ia i le fa’atuatua.
4. O tatou o galuega lelei a ona a’ao, galulue lelei mo lana galuega.

ASO SA. 14 ME 2023.

ASO SA O TINĀ

MANATU AUTŪ: “TINĀ LOTO TETELE I LE FA’ATUATUA.”
(*Mothers’ bravery because of their Faith*)

TUSI FAITAU: Numera 27: 1 – 11.

MATUA: Numera 27: 7.

“E tonu le upu a afafine o Selofeata; e te avatu lava ia te i latou so latou lava tofi faatasi ma le au uso o lo latou tamā; e te tuuina atu ia te i latou le tofi o lo latou tamā.”

Vaega:

1. Tinā loto tele, i le iloa o le amiotonu a le Atua.
2. Tinā fa’atuatua; galue ma le mautinoa i manuia o le Atua.
3. Tinā fa’amaoni, auā e silafia e le Atua mea uma.
4. Tinā alofa, silasila mamao i le lumana’i o fanau ma aiga.

ASO SA. 21 ME 2023.

(FONO TELE)

MANATU AUTŪ: “E LEOLEO MAI LE ALII I LANA EKALEZIA.”
(*God safeguards His Church.*)

TUSI FAITAU: Salamo 121.

MATUA: Salamo 121: 3

“E le tuuina mai e ia ia mapeva lou vae; o lou leoleo e le tulemoē lava ia.”

Vaega:

1. Tumau le fa’atuatua ma le fa’amoemoe i lo tatou Ali’i.
2. Ua i ai i tatou i aso faigata, ae nā o le Atua e malu ai i tatou.
3. Ua silafia e ia ala uma o lana Ekalesia.
4. O le manuia o le Ekalesia o lo’o i ona lava a’ao.

ASO SA. 28 ME 2023.

MANATU AUTŪ: “FAAFETAIA LE ATUA MO LANA EKALEZIA.”
(*Praises be unto Him for His Church.*)

TUSI FAITAU: 1 Korinito 1: 1 – 9.

MATUA: 1 Korinito 1: 4.

“Ou te faafetai atu i le Atua e le aunoa ona o outou, auā o le alofa tunoa o le Atua ua foaiina mai ia te outou ia Keriso Iesu.”

Vaega:

1. O le soifua galulue o le Ekalesia, o le vi’iga lea i le Atua.
2. O galuega lelei uma ua faia, na amata mea lava Keriso.
3. O le tamāoaiga lava mai le Atua, ua fai taulaga ai lana Ekalesia.
4. O le Ekalesia lava i tatou ua fa’apa’iaina mo Keriso Iesu.

ASO SA. 04 IUNI 2023.

(FA’AFOUINA)

MANATU AUTŪ: “O LE ATUA LE FA’AVAE PAPA O SAMOA.”
(*God is still Samoa’s Solid Foundation.*)

TUSI FAITAU: Salamo 95: 1 – 11.

MATUA: Salamo 95: 1 & 2.

“O mai ia, ia tatou alalaga fiafia i le ALII, ia tatou alalaga i le papa o lo tatou olataga. Ia tatou o atu i ona luma ma le viiga; ia tatou alalaga ia te ia i pese.”

Vaega:

1. Alalaga fiafia i le Ali’i, ona o lona alofa ma lona fa’amaoni.
2. Ua 61 tausaga o lana ta’ita’iga, ia vi’ia ma fa’amanūina le Atua.
3. Ia a’oa’oina i tatou i tigā ma faigatā o tausaga ua te’a.
4. Ia tumau Samoa i le Atua na fa’avae ai e tua’a ma matua.

ASO SA. 11 IUNI 2023.

MANATU AUTŪ: “E ĀU I LE TAUOLA E ĀU I LE FAGOTA.”
(*God’s blessings are generational.*)

TUSI FAITAU: 1 Nofoaiga Tupu 17: 1 – 15.

MATUA: 1 Nofoaiga Tupu 17: 11.

“A oo ina faaatoaina ou aso e faatasiina atu ai oe ma ou tamā ona ou faatuina lea o so lau fanau pe a mavae atu oe, o sou atalii foi, ou te faatumauina lona malo”

Vaega:

1. Fa’amaoni i le Atua e inu malie ai fanau o le lumanai.
2. O le tautigā o matua ua o tatou sapi ai i manuia o le Atua.
3. O nei e ta’u maia ananafi, ma iloa ai taeao ma le lumana’i.
4. E leai se tuā’oi o mea lelei. A o le Atua lava le pule fa’asoa.

ASO SA. 18 IUNI 2023.

MANATU AUTU: “AUA LE FIU E AMIO LELEI.”
(*Do not get tired of being good.*)

TUSI FAITAU: Kalatia 6: 6 – 10.

MATUA: Kalatia 6: 9.

“Aua ne’i tatou faapalapala i le amiolelei; auā o ona po e tatau ai tatou te selesele mai ai, pe afai tatou te le faavaivai.”

Vaega:

1. Fa’amalolosi pea ma tumau e fai galuega lelei mo le Ali’i.
2. Ua ‘afa le tausaga, si au manu i mamulu.
3. O lē e lūlū ma loimata, e selesele ma le alaga fiafia.
4. ‘Aua le fa’avaivai, ua mae’a tapena le tau mo ē amio lelei.

ASO SA. 25 IUNI 2023.

MANATU AUTU: “E LELEI LE ATUA I TAIMI UMA.”
(*God is good all time.*)

TUSI FAITAU: Salamo 145: 4 - 13.

MATUA: Salamo 145: 8 & 9.

“E alofa fua mai ma alofa mutimutivale mai le ALII; e tele gese lona toasa, e tele foi lona alofa. O loo agalelei mai le ALII i ana mea uma, o lona alofa mutimuti vale foi ua i ana mea uma na fai.”

Vaega:

1. O le alofa o le Atua e tumau e o’o i le fa’avavau.
2. Ta’u atu le Atua mamana, fa’apei ona ta’uina mai ia te ‘oe.
3. E alofa mai le Atua ae ‘aua e te tofotofa i lona to’asā.
4. O le lelei o le Atua e fou pea i aso uma.

ASO SA. 02 IULAI 2023.

(*FA’AFOUINA*)

MANATU AUTU: “E MAFAIA E LE ATUA MEA UMA.”
(*All things are possible with God.*)

TUSI FAITAU: Luka 18: 18 – 30.

MATUA: Luka 18: 27.

“Ua fetalai atu ia. ‘O mea e lē mafaia e tagata, e mafaia e le Atua.”

Vaega:

1. ‘Au ma le Atua e manuia ai.
2. ‘Aua le masalosalo, fa’amoemoe i le Atua.
3. Fa’alagolago i le mana o le Agaga.
4. Ia mausalī le ola ia Keriso.

ASO SA. 09 IULAI 2023.

MANATU AUTU: “O LE USITA’I O LE FAITOTO’A O MANUIA.”
(*Obedience is the doorway to blessing.*)

TUSI FAITAU: Levitiko 26: 1 – 13.

MATUA: Levitiko 26: 3 & 4.

“Afai tou te savavali i a’u tulafono, ma tausi i a’u poloaiga ma fai ai, ona ou avatu ai lea le ua ia te outou i ona po e tatau ai, e fua mai foi le laueleele i ona lava fua, o laau foi o i le fanua e fua mai ai i o latou fua.”

Vaega:

1. Ia fa’alologo ma faia loa.
2. Savali i ala o le Ali’i.
3. O manuia moni e mai le Atua.
4. E tauia le ‘au’auna usita’i.

ASO SA. 16 IULAI 2023.

MANATU AUTŪ: “O A’OA’IGA E LELEI AI.”
(*Discipline makes one perfect.*)

TUSI FAITAU: Iopu 5: 1 – 18.

MATUA: Iopu 5: 17.

“Fa’auta mai, amuia le tagata ua aoaiina e le Atua; o le mea lea aua e te ta’ufaatauvaaina ai aoaiga a Le e ona le malosi uma lava.”

Vaega:

1. E lē tu’ufaua fanau a le Atua.
2. O le matua alofa moni e aoa’i ma fa’atonu.
3. E lē oge manuia le tagata loto maulalo.
4. E tua leaga le fa’aulumalō.

ASO SA. 23 IULAI 2023.

MANATU AUTŪ: “E MANA’OMIA LE FANAUFUINA.”
(*We need to be born again.*)

TUSI FAITAU: Ioane 3: 1 – 8.

MATUA: Ioane 3: 3.

“Ua tali atu Iesu ia te ia, ‘E moni, e moni, ou te fai atu ia te oe a le toe fanau le tagata, e le mafai ona iloa e ia o le malo o le Atua.”

Vaega:

1. O le ola fou, e amata ia Iesu.
2. O le mālō o le Atua, e mo ē ua fanaufouina.
3. Tu’u le tino ma ona mana’o.
4. Ia fa’asaga tonu i le Ali’i.

ASO SA. 30 IULAI 2023.

MANATU AUTŪ: “O LE FILEMŪ MONI.”
(*True Peace.*)

TUSI FAITAU: Kolose 3: 12 – 17.

MATUA: Kolose 3: 15.

“Ia pule foi le filemu mai ia Keriso i o outou loto, o le mea lea ua valaauiina ai outou e fai ma tino e tasi; ma ia outou saga faafetai.”

Vaega:

1. E lē fa’atupu vevesi le tagata o le Ali’i.
2. Ia mafatōtōga i Afioga a le Atua.
3. E fealofani i tatou pe a tasi ia Keriso.
4. O le alofa o le fa’ailoilo o le filemū.

ASO SA. 06 AOKUSO 2023.

(*FA’AFUINA*)

MANATU AUTŪ: “IA FA’ASINO ALA LE ATUA.”
(*Let God direct your ways.*)

TUSI FAITAU: Isaia 55: 6 – 9.

MATUA: Isaia 55: 8.

“Auā o o’u manatu e le o outou manatu, o o’u ala e le o outou ala, ua fetalai mai ai le ALII.”

Vaega:

1. O le tino e loto lava i mea a le tino.
2. Tu’u lou loto ae fa’alogo i le Atua.
3. O mea sili ua tāpena e le Atua mo ‘oe.
4. O ala o le Atua o ala o le manuia.

ASO SA. 13 AOKUSO 2023. (ASO SA TAMĀ)

MANATU AUTŪ: “IA TAMĀOAIGA I LE POTO.”
(Be enriched with Wisdom.)

TUSI FAITAU: 2 Nofoaiga Tupu 1: 7 – 12.

MATUA: 2 Nofoaiga Tupu 1: 11.

“Ona faapea mai ai lea o le Atua ia Solomona. Ua i ai i lou loto lenei mea, ua e le ole mai i oloa, po o le tamaoaiga po o le mamalu, pe ia oti e ua ita mi ia te oe, ua e le ole mai foi i le ola tulu’i; a ua e ole mai i le poto ma le atamai mo oe, ina ia e mafai ona faamasinoina lo’u nuu, ua tofia ai oe ma tupu.”

Vaega:

1. O ta’ita’iga lelei e fa’avae i le poto mai le Atua.
2. E uma le malamalama o le tagata.
3. Fa’amoemoe i le Atua lau ta’ita’iga.
4. Ia sa’o lau fa’amuamua.

ASO SA. 20 AOKUSO 2023.

MANATU AUTŪ: “E NUMERA TASI ‘OE I LE ATUA”
(You are number one to God.)

TUSI FAITAU: Mataio 10: 26 – 33.

MATUA: Mataio 10: 31.

“O lea aua tou te matatau ai; e sili outou i manu iti e tele.”

Vaega:

1. E silafia e le Atua mea uma.
2. ‘Aua le popole i fa’afitauli.
3. Ia malosi le fa’atuatua.
4. Fa’atino lou vala’auina ma le lē masalosalo.

ASO SA. 27 AOKUSO 2023.

MANATU AUTŪ: “E MANATUA ‘OE I GALUEGA LELEI.”
(You are remembered for your good works.)

TUSI FAITAU: Mataio 26: 6 – 13.

MATUA: Mataio 26: 13.

“E moni, ou te fai atu ia te outou, o nuu uma i le lalolagi e tala’iina atu i ai lenei talalelei, e ta’ua ai le mea ua faia e lenei fafine e faamanatu a’i ia te ia.”

Vaega:

1. E tautala mai le lumana’i i galuega lelei o le asō.
2. Fai le mea lelei mo le Ali’i.
3. ‘Aua le ola manumanu.
4. E manatua ‘oe i au galuega.

ASO SA. 03 SETEMA 2023. ASO SA TALALELEI (FA’AFUINA)

MANATU AUTŪ: “IA MANA LAU MOLIMAU.”
(Let your testimony be powerful.)

TUSI FAITAU: Galuega 1: 6 – 11.

MATUA: Galuega 1: 8.

“A e peitai, o le a maua e outou le mana, pe a afio ifo le Agaga Paia i luga ia te outou; e fai foi outou ma molimau ia te au i Ierusalema, ma Iutaia uma lava, ma Samaria e oo lava i le tulu’iga o le lalolagi.”

Vaega:

1. Ia tutumu i tatou i le Agaga Paia.
2. E lē o le fitafita, e lē o le malosi, a o le Agaga o le Atua.
3. E lē manuia le tala’iga, pe a aunoa ma le Agaga o le Atua.
4. Ia vi’ia le Atua i lou vala’auina.

ASO SA. 10 SETEMA 2023.

MANATU AUTŪ: “FA’AMAONI MA ONOSA’I PEA.”
(*Be honest and always be patient.*)

TUSI FAITAU: Mataio 24: 42 – 51.

MATUA: Mataio 24:46.

“Amuia lea auauna pe a sau lona alii e maua o ia o loo faapea ona fai.”

Vaega:

1. E lē o le amataga, a o le taunu’uga.
2. ‘Aua le fa’atamala.
3. Va’ai i le Atua a e lē o le tagata.
4. E lelei le tau i o le ‘au’auna fa’amaoni.

ASO SA. 17 SETEMA 2023.

MANATU AUTŪ: “SAVAVALI I LE FA’ATUATUA.”
(*Walk by faith.*)

TUSI FAITAU: 2 Korinito 5: 1 – 9.

MATUA: 2 Korinito 5: 7.

“..auā o le faatuatua ua matou savavali ai, a e le o le tino mai o mea.”

Vaega:

1. E faigata a e i’u i le ola fa’avavau.
2. Taula’i le va’ai i le taunu’uga.
3. Savali ma le mautinoa.
4. O lo o tūpua’ia ou faiva.

ASO SA. 24 SETEMA 2023.

MANATU AUTŪ: “AUA LE OLA TAUTU’UA’I.”
(*Do not blame others.*)

TUSI FAITAU: Kenese 3: 8 – 15.

MATUA: Kenese 3: 12.

“Ona fa’apea mai lea o Atamu. ‘O le fafine na e au mai ia te au ua na au mai ia te a’u le fua o le laau, ona ou ‘ai ai lea.’”

Vaega:

1. Afai ua sesē ta’utino le mea moni.
2. O lē e fa’amaoni e fa’amagaloina.
3. E sili le fa’asala i lo le nanā o le agasala.
4. E lē lilo se mea i le Atua.

ASO SA. 01 OKETOPA 2023.

(*FA’AFOUINA*)

MANATU AUTŪ: “O MEA UMA E Ā LE ATUA.”
(*Everything belongs to God.*)

TUSI FAITAU: Iopu 1: 12 – 22.

MATUA: Iopu 1: 21.

“Ua fai atu foi o ia, ‘Na ou sau lē lavalavā mai le manava o lo’u tina, o le a ou foi atu i ai ua lē lavalavā; na foaiina mai e le ALII, ua aveeseina foi e le ALII; ia faamanuina le suafa o le ALII.’”

Vaega:

1. O mea uma na foa’iina mai e le Atua.
2. Fa’ailoa le pule aoao a le Atua.
3. Ia fa’aalologia le finagalo o le Ali’i.
4. Talia le finagalo o le Ali’i i totonu o puapuaga.

ASO SA. 08 OKETOPA 2023. (LOTU TAMAITI)

MANATU AUTŪ: “FA’AMĀSANI LE FANAU I ALA O LE ATUA.”
(*Familiarize the children with God’s ways.*)

TUSI FAITAU: Luka 2: 41 – 52.

MATUA: Luka 2; 52.

“Ua tupu le poto ma le tino o Iesu, ua alofagia o ia e le Atua atoa ma tagata.”

Vaega:

1. E fa’aatoatoa e le Atua fanau.
2. E lē na o le tino a o le agaga
3. Ia ofo atu fanau i le Atua.
4. O ai fanau ta’uleleia?

ASO SA. 15 OKETOPA 2023.

MANATU AUTŪ: “OLA I LE AMIOTONU A LE ATUA.”
(*Live by God’s righteousness.*)

TUSI FAITAU: Salamo 37: 1 – 9.

MATUA: Salamo 27: 6.

“E faaalua e ia lau amiotonu e pei o le malamalama, ma lou faamasinoga e pei o le aoauli”

Vaega:

1. ‘Aua le amanaia le pola motu i tua.
2. Tulituliloa lou fa’amoemoe mai le Atua.
3. Ia lavea’i ē o i le pogisa.
4. Ia faitalia le Atua.

ASO SA. 22 OKETOPA 2023.

MANATU AUTŪ: “IA MAUA LE LOTO FA’AMĀGALO.”
(*Have a forgiving heart.*)

TUSI FAITAU: 1 Samuelu 26: 21 – 25.

MATUA: 1 Samuelu 26: 25.

“Ona fai mai lea o Saulo ia Tavita. ‘Ia manuia oe lou atalii e Tavita, e te faia e oe mea e sili, ma e malo pea lava.’ Ona alu ai lea o Tavita i lona ala, a e foi Saulo i le mea e nofo ai o ia.”

Vaega:

1. Aua ne’i fāoa i le tā lou loto.
2. Ia fa’amagalo fa’a-fitugafulu ni fitu.
3. E sili pea le alofa.
4. ‘Aua ne’i fa’ato’ilaloina ‘oe e le leaga.

ASO SA. 29 OKETOPA 2023.

MANATU AUTŪ: “TALIA LE ALII MANŪ O MAUA LE AVANOA.”
(*Accept the Lord while you still have a chance.*)

TUSI FAITAU: Amosa 8: 11 – 14.

MATUA: Amosa 8: 11.

“O loo faapea mai le Alii le ATUA. ‘Faauta, e oo mai aso ou te tuuina atu ai le oge i le nuu, e le se oge i mea ‘ai, po o se gālala i le fia inu vai, a o le oge i le faalogologo i Afioga a le ALII.”

Vaega:

1. ‘Aua le fa’ataligatuli.
2. O nei lava lou taimi.
3. Va’ai ne’i e tuai.
4. O le filifiliga sili.

ASO SA. 05 NOVEMA 2023. (FA’AFOUINA)

MANATU AUTŪ: “FOA’I MA LE FA’ATUATUA.”
(*Giving in faith.*)

TUSI FAITAU: 1 Tupu 17: 8 – 16.

MATUA: 1 Tupu 17: 14.

“Auā ua fa’apea ona fetalai mai o le ALII le Atua o Isaraelu, ‘E le uma le kate falaoa, e le faaitiitia le suāuu i le fagu, seia oo i le aso e foaiina mai ai e le Alii le ua i le laueleele.”

Vaega:

1. E tupu mea avea ae lē tupu mea teu pea.
2. ‘Aua le foa’i ma le masalosalo.
3. E lē uma manuia o le Atua.
4. O le Atua na te fa’ateleina mai.

ASO SA. 12 NOVEMA 2023.

MANATU AUTŪ: “OFO LE OLA MO LE ATUA.”
(*Offer your life to God.*)

TUSI FAITAU: Mika 6: 6 – 8.

MATUA: Mika 6: 8.

“Sole, ua faaali atu e ia ia te oe le mea lelei; se a foi se mea e finagalo ai le ALII ia te ‘oe, pe a le o ia mea, ia fai le amiotonu, ia naunau i le alofa, ma ia feoi ma lou Atua ma le loto faamaulalo.?”

Vaega:

1. O lē fea e sili i le Atua?
2. Ia naunau i le alofa.
3. Ia savavali ma le Atua.
4. Va’ai lou tautigā ne’i maumau.

ASO SA. 19 NOVEMA 2023.

MANATU AUTŪ: “E LEAGA LE A’A I TUI.”
(*It is bad to go against the goad.*)

TUSI FAITAU: Tanielu 4: 28 – 33.

MATUA: Tanielu 4:30.

“Ua fai ane le tupu, ua faapea ane. ‘E le o Papelonia tele ea lenei na a’u faia i lo’u malosi tele lava, e fai ma fale o le malo, ia viia ai foi lo’u mamalu.”

Vaega:

1. ‘Aua le ola fa’amauualuga.
2. O mea uma e pule ai le Atua.
3. E lelei le poto, ae leaga le fa’afiapoto.
4. ‘Aua ne’i maua ‘ula futifuti.

ASO SA. 26 NOVEMA 2023.

MANATU AUTŪ: “O LE MANA O AFIOGA A LE ATUA.”
(*The power of the Word of God.*)

TUSI FAITAU: Iosua 1: 1 – 9.

MATUA: Iosua 1: 8.

“E le tea i lou gutu le tusi o lenei tulafono, a ia mafaufau i ai i le ao atoa ma le po, ina ia e anaana e fai e tusa ma mea uma ua tusia i ai; ona manuia ai lea ia te oe o lou ala, ona e manuia ai lea.”

Vaega:

1. Taumafa i Afioga a le Atua.
2. O le malamalama i ou ala.
3. ‘Ana’ana i Afioga a le Atua e manuia ai.
4. Ia ola manatunatu i le Ali’i.

ASO SA. 03 TESEMA 2023. (FA’AFOUINA)

MANATU AUTŪ: “O LE ALOFA E FA’AVAVAU O LE ATUA.”
(The everlasting love of God.)

TUSI FAITAU: Salamo 103: 6 – 18.

MATUA: Salamo 103: 17.

“..a o le alofa o le ALII, mai le vavau lava lea, e oo i le faavavau i e matatau ia te ia, o lana amiotonu foi e oo i le fanau a latou fanau.”

Vaega:

1. O manuia o le tagata ola mata’u.
2. E amata mai mauga manuia.
3. E pu’upu’u le ola, e fa’avavau manuia, e fa’avavau fo’i malaia.
4. O le alofa fa’amaoni.

ASO SA. 10 TESEMA 2023.

MANATU AUTŪ: “NE’I GALO LOU ATUA.”
(Lest you forget your God.)

TUSI FAITAU: Teuteronomie 6: 10 – 15.

MATUA: Teuteronomie 6: 12.

“..ia oe, ne’i galo ia te oe o le ALII na na aumaia oe nai le nuu o Aikupito, o le mea sa nofo pologa ai.”

Vaega:

1. Amata i le Atua ma fa’ai’u i le Atua.
2. Ne’i galo Afi’a i si ona vao.
3. Fa’aauau fa’atasi ma le Ali’i.
4. Sauni se Taulaga fa’afetai.

ASO SA. 17 TESEMA 2023.

MANATU AUTŪ: “O LE ATUA FA’AOLA.”
(The saving God.)

TUSI FAITAU: Esekielu 37: 9 – 14.

MATUA: Esekielu 37: 10.

“Ona ou vavalu atu lea e pei ona poloaiina o a’u, ona ulu ane lea o le mānava i totonu ia te i latou, ona latou ola ai lea ma tutū i luga i o latou vae, o le itu taua e matuā tele lava.”

Vaega:

1. E lē uma i le oti le fa’amoemoe.
2. Ola ma le mautinoa.
3. E ofoofogia mea e faia e le Atua.
4. Ia ‘augofie e ola, ia ‘augofie fo’i e oti mo Keriso.

ASO SA. 24 TESEMA 2023.

MANATU AUTŪ: “UA MANATU MAI LE ATUA.”
(God cares.)

TUSI FAITAU: Luka 2: 8 – 17.

MATUA: Luka 2: 10.

“Ona fai mai lea o le agelu ia te i latou, ‘Aua tou te matatau; auā fa’auta, ou te au mai ia te outou le talalelei o le olioli tele e oo mai i le nu’u uma.’”

Vaega:

1. Ua o’o mai le manuia.
2. O le olioli e maua i le Ali’i.
3. O le Talalelei mo ‘oe ma a’u.
4. O ai ‘ea a’u?

ASO SA. 31 TESEMA 2023.

MANATU AUTŪ: “FA’AMĀLOLOSI MA LOTO TETELE.”
(Be strong and courageous.)

TUSI FAITAU: Esoto 14: 15 – 22.

MATUA: Esoto 14: 15.

“Ona fetalai mai lea o le ALII ia Mose. “Se a le mea ua e alaga mai ai ia te a’u? Fai atu i le fanauga a Isaraelu, ia o latou o atu pea ia.”

Vaega:

1. O le solomuli o aga a le pala’ai.
2. Ia toa le loto.
3. O le tatou malaga e fa’auau pea.
4. Fa’ai’u ma sauni e toe amata.

TUSI FAITAU: Sālāmo 127:3-5

MATUA: Sālāmo 127:3

“Fa’auta o le fanau o le tofi lea mai le Atua, o ē ua fanau mai, o le tauī lea mai ia te Ia”

MANATU AUTŪ: “O LE FANAU O LE TOFI LEA MAI LE ATUA”

- O le Sālāmo lenei, o le Pese sa fa’aaogaina e tagata Isaraelu i o latou Aso Faamanatu, ma aso Fa’ailogaina.
- E pei o Aso Fa’amanatu e afu ai la’au, latou te pepese fa’afetai ai i le Atua, ma o latou mo’omo’oga i le tausiga alofa a le Atua, auā o la latou mau lea **“Afai e le atiina’e e le Atua le fale, e galulue fua i latou o ē atiinae”**
- O lo o fa’a-Amuia ai fo’i le fai-Salamo i se aiga ua maua se oloa fou mai le Ali’i, se tama po o se teine, auā o ia o le tofi mai le Atua, o le lumanai manuia fo’i o se aiga
- O le tofi i le manatu o le fai-Salamo, o le tauī lea mai le Atua mo lana fanau fa’atuatua. O le mea-alofa a lona alofa Tunoa. O le pine fa’amaui fo’i lea o fa’amanuiaga a le Atua mo se aiga.

- E taua tele i le Atua le tagata, o lona tofi i le lalolagi, o le tagata ola na faia i lona faatusa ma ia foliga ia te Ia.
- O lo o fa’ailoa mai i le Sālāmo lenei se feau taua. O lo o aumai ai le Talitonuga o le Feagaiga Tuai, o le ola fa’alagolago lea o so’o se tagata soifua, i fa’amanuiaga sasa’a mai le Atua. O le a’ea’e ma inu i nei fa’amanuiaga, o mea-alofa mai le Atua
- Ua tatou i ai i lenei afiafi e fa’amanatuina se tasi o tausaga ua atoa i ai le tolu o tausaga o Zion, o le tofi mai le Atua fa’apei fo’i o i tatou uma i lenei afiafi.
- O le vi’iga lea ma le fa’afetai i le Atua auā ua le gata i lenei tausaga ua fa’aopoopo i le olaga o Zion a e fa’apea foi i le fa’aopoopoina pea o aso o lo tatou ola tatou.
- A o le tatalo lava, ia fai lenei tama ma ū fanafana i le lima o le toa. O fanau malolosi ma maloloina, ua fa’auigaina o ni au’upega e fa’alagolago i ai o latou matua ma aiga.
- Ia pupula fofoga alofa o le Ali’i i ona luga, ia tupu a’e ma le poto ma le atamai ma le mata’u i le Ali’i.
- O Iesu o le atalii pele o le Atua, o le tofi o le Atua, ua fai lona ola ma Taulaga mo e agasala ina ia iloa e le tagata le taua o le ola a le Atua i le tagata faapea fanau o tofi mai le Atua ma aiga.

